

Est & Cien mons haud procul à Jungsin, ingens ac præruptus.

Flumina.

Mie lacus, hoc est lacus mellis, prope Ganfo ita dictus à suavissimis, quos alit, piscibus. Kien lacus est prope Kiexui; Can flumen ad ortum urbem præterlabitur.

Lu flumen haud procul à Kiexui, ejus origo prope Jungfung in montibus est, & ad ipsa mœnia duos excipit amnes, Xanglu nimirum, & Hialu, mox versus occasum fluens, & deinde ad Barrapeliotem nonnihil deflectens nomen immutat modo Luyuen, modo Lupo dicitur.

Kie amnis sive Ven, civitatis Kiexui territorium pertransit, suisque gyris ac mœandris, hanc fere litteram efformat 吉, quæ Kie, hoc est felicitas, dicitur. unde & Kiexui civitati nomen, quod felicem aquam significat.

Senting rivus prope Jungsin fistula dicitur, eo quod ejus aqua, per saxa velocissimo cursu profluens suave murmur, ac quasi gratam vocem suo decursu efformet.

Decima Urbs

X V I C H E V.

*Regionis
amenni-
tas.*

AD Barrolybicum prioris urbis Hoayang amni vicina jacet urbs Xuicheu, fortunata dicitur, quod ipsa vox Xui indicat, ab aëre mitissimo ac saluberrimo, agro campisque fecundissimis, quod vel inde facile colligere est, cum sola per sese trecenta millia saccorum oryzæ pendat pro tributo, cum tamen tres solummodo sub se civitates numeret, quarum 1 Xuicheu, 2 Xangcao, 3 Sinchang. Urbis regio undequaque montibus ac sylvis clauditur, qui amoenissimum adspectum præbent, pagi in iis multi, passimque culti, copiosos etiam ubique fere habet rivos, in quibus auri etiam atque argenti ramenta reperiuntur. è montibus quoque lapis lazulus effoditur, & color ille viridis, quem Xelo Sinæ vocant. sub Tanga familia propter oryzæ abundantiam Micheu dicta est, hoc est oryzæ civitas, hodiernum illi nomen à Sunga familia est.

Montes.

Ad partem Orientalem urbis mons est Tayu, in cujus pulcherrima sylva magnificum visitur idolorum fanum.

Prope Xangcao mons est, Lingfung vocant, in quo post diurnas pluvias noctu semper ingens flamma apparet, sicco tempore non item. superstitioni gens illic admodum dedita spiritum montis illam esse credit, ac

proinde splendidum ibi ignis fanum est versus civitatem Sinchang.

Cho lacus, aqua constat maxime limpidus, & fere nunquam turbida, prope Sinchang.

Xo flumen ad Xangcao, ejus scaturigo ebullit circa civitatem Vançai urbi sequenti subditam; epotam hujus fluminis aquam multis mederi morbis, constans fama est. intra ipsa mœnia fons est aquæ optimæ, Puenfue dictus.

Undecima Urbs

I V E N C H E V.

NEc feracitate nec amœnitate hujus urbis regio à superiori discrepat; Huquang Provinciæ, cui admodum vicina est, persimilis; quatuor regit civitates: 1 Juencheu, 2 Fueny, 3 Pinghiang, 4 Vançai. Regum tempore modo ad U, modo ad Cu regnum pertinuit, Hana familia Ychúen dixit, Tanga hodierno insignivit nomine. effoditur hic vitriolum & alumen, heroibus dicata quatuor numerat nobiliora fana.

Mons Niang, sive spectabilis, ad australem urbis partem est, spectabilis tantum sive visibilis dicitur, eo quod undique præruptis faxis horridus ob præcipitia & voragines, videri quidem, at non adiri possit; trecenta stadia in ambitu obtinet, ex eo fons emanat, cujus aqua toto anno ita frigida est, ut nemo illam bibere possit, nisi prius aliquanto tempore soli fuerit exposita.

Xo flumen etiam Kin dicitur, de eo fufius egi supra.

Tung lacus ad ortum urbis situs, urbis vocatur deliciæ, eum enim Sinæ convivium celebraturi frequentant, qua de causa ad ripam palatia variasque aulas habet ad animi relaxationem illis exstructa.

Mingyo lacus veluti pro fossa urbi est, & intra ipsam urbem per plateas ubique navigium patiens est, ortum versus cum superiori conjungitur.

Duodecima Urbs

C A N C H E V.

IAcet Cancheu ad duorum fluminum Chang & Can confluentes: qui ad partem mœniorum Boream diffusi lacum quodammodo efformant. vix cedit ipsi metropoli: telonii emporiique nobilitate ac frequen-

Flumina.

Montes.

Flumina.

*Nobilitas
ac situs.*